

Imigassaq pillugu Inatsisartut inatsisaata allanngortinneqarnera pillugu Inatsisartut inatsisaat nr. 9, 12. juni 2019-imeersoq

(Inuusuttut imigassanik aalakoornartulinnik sassaalliteqartarfinni piffissami qaqugu isersimasinnaanerannik allanngortitsineq, niuertarfinni nioqquteqarnermut piffissat ammaffiusartut sivitsorneqarnerat, imigassanik aalakoornartortalinnik ussasaarinermik inerteqqutip atorunnaarsinneqarnera; imigassat aalakoornartortallit niuertarfinni assiaqusersorneqarnissaannik atorunnaarsitsineq aamma inuit sassaalliteqartarfinni isersimanissaannik inerteqquteqarfigineqarsimasut pillugit paasissutissanik ingerlatitseqqinnissamut periarfissaliissut)

§ 1

Imigassaq pillugu Inatsisartut Inatsisaanni nr. 35, 23. november 2017-imeersumi uku allanngortinneqassapput:

1. Inatsimmi tamarmi ”03.00” ima allanngortinneqassaaq: ”04.00”.

2. § 20, *imm. 4*, imatut oqaasertalerneqassaaq:

” *Imm. 4*. Nal. 23.00-ip kingornatigut meeqqat aamma inuusuttut 18-it inorlugit ukiullit sassaalliteqartarfinnut imigassanik aalakoornartortalinnik sassaalliteqartunut iseqqusaassanngillat angajoqqaaminnit, angajoqqaatut akisussaasumik imaluunniit inummik allamik inersimasutut oqartussaassusilimmit inersimasuunngitsumut immikkut akisussaasumit ingiaqateqanngikkunik. Akuersissummik pigisaqartup aamma taassuma sulisuisa pisussaaffigaat nakkutigissallugu inuusuttup 18-it inorlugit ukiullip pissusissamisoortumik ingiaqateqarnissaa.”

3. § 25, *imm. 1*, imatut oqaasertalerneqassaaq:

” Imigassanik aalakoornartortalinnik nioqquteqartoqarsinnaavoq ataasinngornermiit arfininngornermut nal. 10.00-imit 20.00-imut.”

4. § 26, *imm. 1-imi nr. 3-p* kingorna nutaatut ilanngunneqassaaq *nr. 4*:

”4) Unnuakkut ullut freerfiusussat nallilerneranni nal. 12.00-imit 04.00-imut. Freerfiusussat ima paasineqassapput ullut nalliuttut, tak. § 2, *imm. 7*.”

5. § 26-ip kingornatigut immikkoortumut qulequtaq imatut oqaasertalerneqassaaq:

”Imigassanik aalakoornartortalinnik akeqanngitsumik agguaneq”

6. § 27-imi, *imm. 1 – 2 aamma imm. 4 – 5*, atorunnaarsinneqarput.

Imm. 3 tamatuma kingornatigut tassaalerpoq *imm. 1*.

7. § 27-p kingornaniittoq immikkoortup qulequtaa peerpoq.

8. § 28 atorunnaarsinneqarpoq.

9. § 32-mi imm. 1-ip kingornatigut imm. 2 nutaaq ilanngunneqassaaq:

” Imm. 2. Politiit piginnittunut aamma aqutsisunut paasissutissat ingerlateqqissinnaavaat inunnut imm. 1 naapertorlugu sassaalliuteqarfimmi pineqartumi isersimanissamut inerteqquteqarfigineqartunut tunngasut.”

Imm. 2 taamaalilluni tassaalerpoq imm. 6.

10. § 32-imi imm. 2-p kingornatigut imm 3-5-itut ilanngunneqassapput:

” Imm. 3. Paasissutissat politiinit imm. 2 tunngavigalugu ingerlateqqinneqartut taamaallaat piginnittunit, aqutsisunit aamma matulerisunit suliarineqarsinnaapput, taamaattorli tak. imm. 4, suliarinninnerlu taamaallaat pisinnaavoq imm. 1 naapertorlugu inerteqqutigineqartup atuutsinneqarnissaata pisariaqarnera tunngavigalugu.

Imm. 4. Piginnittut, aqutsisut aamma matulerisut nipangiussisussaataapput paasissutissanut imm. 2-mi taaneqartunut tunngatillugu. Tamanna taamatutaaq atuuppoq inunnut imm. 5 naapertorlugu aalajangersakkat aalajangersarneqarsimasut kingunerisaannik paasissutissanik pineqartunik suliarinnittussanngortitaasut. Pinerluttulerinermi inatsit §§ 50 – 54.

Imm. 5. Taamatutaaq Naalakkersuisut maleruaqqusanik aalajangersaasinnaapput paasissutissat imm. 3-mi taaneqartut suliarineqarnissaannut tunngatillugu, tamatumunnga ilanngullugit paasissutissat pineqartut inunnit allanit, imm. 3-mi taaneqartut saniatigut, suliarineqarsinnaanerannut tunngatillugu.”

11. § 43-mi, imm. 1, peerneqarpoq ”§ 27, imm. 1 aamma 3, § 28, imm. 1, ”.

§ 2

Inatsisartut inatsisaat ullup saqqummiunneqarfimmi aqaguani atortuulissaaq.

Namminersorlutik Oqartussat, ulloq 12. juni 2019



Kim Kielsen